

A Xunta de Goberno desta Deputación Provincial na súa sesión ordinaria do día 3 de maio de 2024, adoptou, entre outros, o seguinte acordo:

2.33730.- APROBACIÓN DAS BASES REGULADORAS DO PROGRAMA “LEGER EN FAMILIA” 2024. (Expte 2024023458)

1º.- A Deputación de Pontevedra, a través do Servizo de Benestar Social, ten entre os seus obxectivos o fomento das políticas sociais a través da modernización e reforzo do conxunto dos servizos sociais, promovendo a innovación e un modelo de atención centrada na persoa.

Nesta liña, a Deputación de Pontevedra quere reforzar o principio básico deste enfoque baseado na familia como estrutura básica da sociedade e como medio natural de desenvolvemento e crecemento da persoa. Por iso é deber dos poderes públicos reconecer e amparar á familia en todas as súas manifestacións e formas de organización, dándolles un especial apoio e protección.

Constituída a nova corporación provincial, no exercicio das súas competencias, promove este novo programa que recolle o espírito e os obxectivos de dita Lei, e promove o benestar familiar, na procura de establecer medidas que apoiem e fomenten a unión e a saúde das familias da provincia.

Neste senso a Deputación de Pontevedra, a través do Servizo de Benestar Social, convoca a primeira edición dun programa para familias empadroadas na provincia de Pontevedra, entendendo a familia como un poderoso axente de socialización para desenvolver habilidades sociais, e crear tempo de lecer de calidade, no que propiciar o benestar e a satisfacción persoal mediante emocións, sentimentos e afectos positivos.

Así mesmo, pretende ser un programa dinamizador da economía da provincia que impulse a creación e o mantemento de postos de traballo no sector turístico durante os períodos de menor actividade ao desestacionalizar a demanda.

2º.- Desde o punto de vista competencial, no artigo 2 da Lei 13/2008, de 3 de decembro, de servizos sociais de Galicia, defínense os servizos sociais como un conxunto coordinado de prestacións, programas e equipamentos destinados a garantir a igualdade de oportunidades no acceso á calidade de vida e á participación social de toda a poboación galega, mediante intervencións que permitan lograr os obxectivos marcados nesta lei. No seu artigo 63, relativo ás competencias das deputacións provinciais, establécese que, de conformidade co previsto na normativa de réxime local, estas proporcionarán asistencia económica, técnica e xurídica aos concellos na execución das súas competencias en materia de servizos sociais.

Ademais, no ámbito provincial, no artigo 36.1.d) da Lei 7/1985, de 2 de abril, reguladora das bases de réxime local, dispónse que é competencia propia da Deputación a cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas neste ámbito.

Así mesmo, no artigo 109 d) da Lei 5/1997, de 22 de xullo, de Administración local de Galicia, establécese que serán competencias propias das deputacións provinciais as que baixo este concepto lles atribúan as leis e, en calquera caso, entre outras, fomentar e administrar os intereses peculiares da provincia.

3º.- A finalidade do programa é reforzar lazos familiares nun ambiente de convivencia que permite desconectar do estrés diario e gozar dun ocio de calidade en familia, reactivando emocións positivas para toda a familia, xa que serve como actividades para mellorar a comunicación familiar; fomentando a diversión compartida e a construción de recordos; e desenvolvendo a autoestima e autoconfianza, ao tempo que fomenta o desenvolvemento da autonomía.

O ámbito temporal do programa será nos meses de temporada baixa, a partir do 15 de setembro e ata o 15 de decembro de 2024.

Este programa caracterízase por ofrecer unha estancia de fins de semana, nun establecemento hoteleiro (balneario, talaso, spa ou outras instalacións de características similares) da provincia de Pontevedra, con aloxamento dunha noite (venres ou sábado) en réxime de media pensión.

A estada incluírá a utilización do spa, balneario, talaso un mínimo de dúas horas ao día e actividades con animación sociocultural infantil.

A entrada nos establecementos será o venres pola tarde con saída o sábado ao mediodía, ou entrada o sábado pola tarde e a saída o domingo ao mediodía.

A Deputación ofertará o programa a través dunha empresa especializada na materia, responsable de executalo, coordinalo e avalialo, e que contará con persoal cualificado.

4º.- Poderán ser beneficiarias todas as persoas integrantes dunha unidade familiar con menores a cargo que teñan a súa residencia na provincia de Pontevedra.

Para os efectos destas bases, enténdese por unidade familiar a formada pola/s persoa/s adulta/s e, as fillas e os fillos e persoas maiores que convivan de xeito permanente ou temporal, coa persoa solicitante.

Así mesmo, terán a consideración de fillos e fillas as persoas en situación de garda con fins adoptivos e en acollemento familiar.

As persoas participantes deberán acreditar o parentesco ata o primeiro grao por consanguinidade e/ou afinidade coa persoa solicitante, e deberán estar empadroadas no mesmo domicilio. Exceptuase o requisito de empadramento no mesmo domicilio, no caso de familias que acrediten unha situación de separación ou divorcio legal.

As persoas interesadas deberán reunir ademais os seguintes requisitos:

- 1) Non padecer ningunha enfermidade ou patoloxía incompatible coa actividade do programa.
- 2) Non padecer alteracións de comportamento que poidan perturbar a normal convivencia nos establecementos nin enfermidades con risco de contaxio.
- 3) Ser unha persoa autónoma para realizar as actividades elementais da vida diaria.
- 4) No caso de persoas con discapacidade con necesidade de asistencia dunha terceira persoa, será un membro da propia unidade familiar quen prestará os coidados que precise.

5º.- A concesión destas prazas realizarase polo réxime de concorrencia non competitiva. O órgano instructor dos expedientes será, de acordo coa competencia para coñecer e resolver as solicitudes, o Servizo de Benestar Social.

A adjudicación corresponderalle á Xunta de Goberno. Excepcionalmente, por razóns de urxencia xustificada, poderá autorizarse por resolución do Presidente, que lle dará conta con posterioridade á Xunta de Goberno.

6º.- Ofértanse 2.350 prazas nos seguintes termos:

- 2.300 prazas de réxime xeral; a Deputación subvencionará: 75 euros do custo total da praza para as persoas maiores de 16 anos, 50 euros para as persoas de 4 a 16 anos, e o 100% no caso dos menores de 4 anos.
- 50 prazas de réxime especial; a Deputación subvencionará 130€ do custo da praza

Poderán ser beneficiarias das prazas de réxime especial, as persoas que cumpran os requisitos establecidos e que sexan beneficiarias da Renda de Integración Social de Galicia ou perceptores do Salario Mínimo Vital.

Se non se cobren as prazas de réxime especial, o crédito retido para estas prazas pasará a incorporarse á concesión de prazas de réxime xeral.

A contía prevista para esta convocatoria é de cento setenta e nove mil euros con (179.000,00 €) con cargo á aplicación 24/231.2311.227.07 do Orzamento provincial.

5º.- Con data 18/04/2024 Secretaría Xeral emite informe xurídico de conformidade coa proposta de bases (CSV 50YH7OYTUMCJC39D) e con data 26/04/2024 o Servizo de Intervención informe favorablemente o expediente (CSV 4XBQ4Q4F5KOHU0FX).

De cordo có exposto, a Xunta de Goberno acorda por unanimidade:

- Aprobar as bases reguladoras do Programa “*Lecer en familia*” para o ano 2024

Ditas Bases figuran asinadas dixitalmente có (CSV): 3F2JMKB81H9ZF3QJ.

Pódese verificar a integridade deste documento no enderezo: <https://sede.depo.gal>.

O que lle comunico a Vde. para o seu coñecemento e efectos, coa salvidade que establece o art. 206 do RD 2568/86, de 28 de novembro.

*Asinado dixitalmente na data que figura á marxe.*

Contra este acordo que pon fin á vía administrativa poderá interpoñer recurso potestativo de reposición perante o mesmo órgano que o ditou, no prazo de un mes a partir do día seguinte ó desta notificación (*artigos 112 e 124 da Lei 39/2015, de 1 de outubro, de Procedemento Administrativo Común das Administracións Públicas*), ou ben, directamente recurso contencioso-administrativo perante o Xulgado do Contencioso-Administrativo de Pontevedra segundo o disposto no artigo 8 da Lei 29/1998, de 13 de xullo, Reguladora da Xurisdición Contencioso-Administrativa, e todo iso no prazo establecido no artigo 46 da citada Lei.

Todo iso sen prexuízo de que poida utilizar calquera outro recurso que estime conveniente.